

第二課 詞選

虞美人

春花秋月何時了，
往事知多少？
小樓昨夜又東風，
故國不堪回首月明中！
雕闌玉砌應猶在，
只是朱顏改。
問君能有幾多愁？
恰似一江春水向東流！

南鄉子

何處望神州？
滿眼風光北固樓。
千古興亡多少事？
悠悠，不盡長江滾滾流。
年少萬兜鍪，
坐斷東南戰未休。
天下英雄誰敵手？
曹劉。生子當如孫仲謀。